

## IMPLEMENTERING VAN VLAK 4 WATERBEPERKINGS



Munisipaliteit Swartland het vlak 4 waterbeperkings goedgekeur met ingang vanaf 1 Augustus 2017 tot verdere kennisgewing.

### BEPERKINGS VAN TOEPASSING OP ALLE VERBRUIKERS

- Geen besproeiing/natlei met munisipale drinkwater word toegelaat nie. Dit sluit in die natmaak van blombeddings, grasperke, groentetuine, landbougewasse, sportgronde, gholfbane, skole, onderwysinstellings, kwekerye, parke en ander openbare oop ruimtes. Kwekerye en kliënte gemoeid met landbou-aktiwiteite of historiese tuine mag aansoek doen om vrystelling.
- Alle eiendomme waarop gebruik gemaak word van alternatiewe, nie-drinkbare waterbronne (bv. opgevangde reënwater, gryswater vir hergebruik, behandelde rioolwater, fonteine, syfer- en boorgatwater) moet toepaslike kennisgewings aanbring wat duidelik sigbaar is vanaf 'n publieke deurgang. Verbruikers van hierdie bronne mag slegs natlei/besproei voor 08:00 en na 18:00 vir 'n maksimum van een uur per dag, maar word ten sterkste aangemoedig om nie enige areas nat te lei binne sewe dae na reënval met genoegsame deurdrenking nie.
- Die gebruik van munisipale drinkwater om harde oppervlaktes, mure, dakke of geplaveide areas af te spuit, word nie toegelaat nie. Gebruikers, soos abattoirs, voedselvervaardigingsindustrieë, sorgfasiliteite, dierskuilings en ander industrieë of fasiliteite met spesiale behoeftes mag aansoek doen om vrystelling.
- Die opvul of volmaak (hetsy met die hand of outomaties) van swembaddens, selfs al is dit met 'n seilbedekking toegerus, word nie toegelaat nie. Dit sluit die volmaak van nuwe swembaddens of die hervul van 'n bestaande swembad na herstelwerk in. Dit is van toepassing op alle swembaddens, ingesluit publieke swembaddens en swembaddens by klubs, besighede en instellings.
- Die gebruik van munisipale drinkwater vir die afkoeling van enige dakoppervlakte, word verbied.
- Die gebruik van munisipale drinkwater vir ornamentele fonteine en waterfokuspunte word verbied.
- Verbruikers word aangemoedig om toilette (met die hand deur gebruik te maak van 'n emmer) te spoel met gryswater, reënwater of ander nie-drinkbare water.

### BEPERKINGS VAN TOEPASSING OP ALLE RESIDENSIËLE VERBRUIKERS

- Die was en afspoel van voertuie, sleepwaens, karavane en bote met munisipale drinkwater word verbied. Nie-munisipale drinkwater of waterlose middels of droogskoonmaakprosesse moet gebruik word vir die was hiervan.
- Die gebruik van skuifbare speelswembaddens ('portable pools'), ingesluit glij & gly ('slip & slide') opblaasbare toerusting word verbied.
- Kliënte word ten sterkste aangemoedig om waterdoeltreffende onderdele, toebehore en tegnologie te installeer om waterverbruik by krane, stortkoppe en ander loodgieterskomponente te beperk.
- Kliënte word aangemoedig om nie meer as 87 liter water per persoon per dag vir basiese humanitêre behoeftes te gebruik nie (kumulatief deur die dag, ongeag waar u u bevind).

### BEPERKINGS VAN TOEPASSING OP NIE-RESIDENSIËLE VERBRUIKERS

- Die was en afspoel van voertuie (ingesluit taxi's), sleepwaens, karavane of bote met munisipale drinkwater word verbied. Voertuie, sleepwaens, karavane en bote moet met nie-drinkbare water of waterlose produkte of droogskoonmaakprosesse gewas word. Dit is van toepassing op sowel formele as informele karwasserye.
- Die gebruik van pasgemaakte bedekkings vir publieke swembaddens word sterk aangemoedig, indien prakties moontlik.
- Outomatiese opvulsisteme vir swembaddens word nie toegelaat nie.
- Die bedryf van waterspeelpoele ('spray parks') word verbied.
- Kliënte/fasiliteite moet waterdoeltreffende onderdele, toebehore en tegnologie installeer om waterverbruik by alle krane, stortkoppe en ander loodgieterskomponente in publieke plekke te beperk.
- Gholfbane, sportfasiliteite, parke, skole en opvoedkundige instellings mag nie nuwe tuine uitlê (landskapering doen) of sportvelde aanlê nie, behalwe indien dit slegs met nie-drinkbare water besproei word.
- Ten aansien van verbruikers wat van water voorsien word in terme van 'n spesiale ooreenkoms (bv. notariële aktes of waterdiensverskaffers) sal die kontrakvoorwaardes geld.

### IMPLEMENTERING VAN VERHOOGDE WATERTARIEWE

Die volgende tariefaanpassings sal geïmplementeer word ten aansien van huishoudelike verbruikers in die Swartland munisipale area, met effek vanaf die diensterekening wat gedurende Augustus 2017 aan verbruikers gelewer sal word vir betaling teen 31 Augustus 2017:

	<b>Tarief per eenheid (kl)</b>
0 tot 4 kl	R6,30 plus BTW
5 tot 25 kl	R17,61 plus BTW
26 tot 50 kl	R24,25 plus BTW
51 kl en meer	R37,53 plus BTW

Ten opsigte van besighede (ingesluit skole, regeringsinstellings en sportklubs) sal die volgende tarief geïmplementeer word met effek vanaf die diensterekening wat gedurende Augustus 2017 vir betaling teen 31 Augustus 2017 gelewer sal word:

R25,00 plus BTW vanaf die eerste kiloliter van verbruik

BOETES/...

**BOETES**

Benewens 'n hoë diensterekening vir watermisbruik, loop verkwalers die risiko om beboet te word vir die oortreding van enige van die beperkende maatreëls hierin. 'n Boete van R500,00 per oortreding sal geld. Die boete mag maandelik binnekort verhoog.

**AANSOEK OM VRYSTELLING**

Kliënte met spesiale vereistes mag by die Direkteur: Korporatiewe Dienste aansoek doen om vrystelling van die waterbeperkings. Besoek ons webtuiste ([www.swartland.org.za](http://www.swartland.org.za)) om die aansoekvorm te bekom.

**NEEM ASB KENNIS:**

- (1) Alle vrystellings wat onder die vlak 2 of vlak 3 beperkings toegestaan is, word hiermee met onmiddellike effek opgehef en geen nuwe vrystelling sal oorweeg word tensy soos hierbo na verwys.
- (2) Om lekkasies te verminder, mag die waterdruk verlaag word benede die toepaslike wetgewing of standaardvereistes om lekkasies te verminder, wat onderbrekings/skommelings in die watertoevoer mag meebring.
- (3) Die Munisipaliteit reserveer die reg om Aqualoc-watermeters (wat daaglikse waterverbruik reguleer) te installeer in daardie gevalle waar water misbruik word.

**J J SCHOLTZ**  
**MUNISIPALE BESTUURDER**

**Julie 2017**